



24. april 2024

UPA 2024/75/123

UPA 2024/75: Namminersorneq pillugu Inatsimmi § 21 atuutilersinneqarnissaa siunertaralugu ataatsimiitaliamik pilersitsisoqarnissaanik Naalakkersuisut peqquneqarsinnaannik Inatsisartut aalajangiiffigisassaattut siunnersuut.

(Inatsisartunut Ilaasortaq, Kuno Fencker, Siumut)

UPA 2024/123: Inatsisartunut qinersinissamut atatillugu Naalagaaffinngornissaq pillugu isumasiuilluni innuttaasut taasitinneqarnissaannik Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq, Aqqalu C. Jerimiassen, Atassut)

Siunnersuuteqartoq Kuno Fencker, Siumut aammalu siunnersuuteqartup aappaa Aqqalu C. Jerimiassen Siumumiik qujaffigaangut. Taassisutissat assigiinngitsut marluupput siulleq ataatsimiitaliamik pilersitsinissaq naggataatigullu innuttaasunik taasisitsinissaq. Siunnersuutip aappaa innuttaasunik isumasiuilluni taasisitsinissamik imaqarpoq.

Siunnersuutit taakkua ataatsimoortillugit akineqartussanngorsimammata erseqqissumik aallarniilluta oqaaseqarnitsinni erseqqissassavarput Kuno Fencker, Siumut siunnersuutaata tunngavia tapsereratsigu taamatuttaaq Aqqalu C. Jerimiassen, Atassut siunnersuutaa pillugu isumaqarpugut suliamut ilaatinneqarsinnaasoq piffissaq taanna qaquguluunniit nallertussaagatsigu. Taamatut aallarniuteqareerluta Siumumiik imaattumik oqaaseqaateqassaagut:

Piumassuseqaratta namminersorneruneq 1979-imi eqqupparput.

Piumassuseqaratta namminersorneq 2009-mi eqqupparput.

Piumassuseqaratta tunngaviusumik inatsisissaq suliaraarput tullullinnguupporlu anguniakkatta pingarnersaat tassalu Naalagaaffinngornissaq.



Piumagutta massakkoqqissaaq periarfissaqarpugut §21 aallartinnissaanut pisinnaatiffippummi inatsimmi allaqqareerpoq, apeqqutaaginnarpormi tamanna qanoq anguniarneripput.

Piumagutta sukkasuumik angusinnaavarput piumaguttalu ukiorpassuit utoqqatsissutissaqartuarluta kinguarsartuarsinnaallutigu.

Siumumi periarfissaq siulleq toqqarparput tassa siunissami qaninnermi nunatta naalagaaffinngornissaa. Taamaattumik alloriaqqikkusuppugut Namminersorneq pillugu Inatsimmi §21 atuutilernissaa siunertaralugu ataatsimiititaliamik pilersitsisoqarnissaa tamakkiisumik Siumumiik taperserparput isumaqatiginninniarnerit aallartittariaqarmata.

Manna nuna tummaarisarput, inuiannik assigiinngitsunik najugaqarfingineqartarsimavoq kingulliillu najugaqartut tassa siuligut kalaallit. Inuaat ikittunnguulluta nuna manna ineriartortipparput nunasiaataanitsinni naqisimaneqartalaruarluta killiffik angusarput ajorisassaangilaq alloriaqqittariaqarpugulli. Siuligut imminnut pilersorlutik napatittut sappingippata uaguttaaq sappingilagut.

Nammineerluta nunanik allanik suleqateqarusukkutta naqisimaneqarata kiffaanngissuseqarluta suleqateqarsinnaasariaqarpugut. Nammieerluta akuleruffingineqaratalu nunanik allanik isumaqatiginninniarsinnaasariaqarpugut.

Inuaat kalaallit nuna manna qanoq alloriaqqissanersoq naggataatigut taasissutigissavaat nunamik piginnittuulluta tamakkiisumillu oqartussaalernissarput siunertaralugu.

Alloriartariaqavippugut tassami namminersornermut inatsit taamaatsillugu nuna manna naalagaaffinngornavianngilaq. Ilaannakortumik oqartussaatilluta mattusimaneqartuassaagut ineriartoqqinnissarpullu mattusimaneqartuassalluni, iluaqtissaq uagut nammieq tigussallugu piffissanngorpoq taannamiuna pisariaqartikkipput.

Naalagaaffinngornissatsinnut akisussaaffiillu tamakkiisumik tigunissaannut nunanik allanik suleqateqarnissarput pisariaqartipparput, taamaattumik ataatsimiititaliaq piareersaasussaq pisariaqartipparput.

Naalakkersuisut allannguutissatut siunnersuutaat tunngaviusumik paasivarput aamma Siumut isumaqarpoq ataatsimiititaliamut suleriaqqinnissamut tunngavissat ilagisinnaagaat. Ataatsimiititaliami suleriaqqinnissamut uku akissutisisariaqartutut Siumup isigai:

1. Ataatsimiititaliap suliassai oqaasertalorsorlugit aallartinneqassasut



2. Piffissalersuisimanissaq tunngaviusumik isummerfigineqassasoq
3. Inatsisit suut pineqarnersut erseqqissarneqassasut

Siumumi isumaqarpugut suliaq ima pingaaruteqartigisoq qinersisoqareeraluarpalluunniit suliaq unitsinneqarani ingerlaannassasoq tamannalu qularnaarneqassasoq kissaatigaarput.

Naalagaaffinngorusuprugut periarfissarpasuatsinnik Danmarkimiik mattusimaneqarata. Periarfissaq atorlugu alloriaqqinnissat tullii uagut aallartissuagut, tullinguutissaq ataatsimiitaliamik pilersitsinissaq, Inatsisartut pisinnaatitsissapput naggataatigullu innuttaasut taasitinneqassallutik.

Naggasiutigalugu Jørgen C. F. Olsen-ip oqaaserisimasai issuarusuppakka:

"Inuaat aatsaat avataanit akuleruffigineqarnatik namminneerlutik imminnut aquleraangata, aatsaat kiffaanngissuseq tamakkiisumik anguneqartarpoq".

Taama oqaaseqarluta uku pineqartut Inatsisartut Inatsiseqarnermut Ataatsimiitaliaannut ingerlateqqinneqarnissaa innersuupparput.

Sapinngilagut piareersimavugut alloriaqqikkusuprugullu, suleqatiserivatsigit – illit, uagut nunarpullu pillugit!

Doris J. Jensen

Siumut